

2014 Alegria y Fantasia carnaval 60

Entregamento di CD di “Ola Caribense”



ORANJESTAD— Diaranson atardi 5'or a tuma luga na residencia di nos Tata di Cultura Padu Lampe, entregamento di e cd di Ola Caribense na Padu Lampe y na Glenda Diaz, sobrina di defunto Rufo Wever. Edwin Abath tabatin e honor di entrega e cd na Padu, mientras cu Ito Tromp a entrega e cd na Glenda Diaz. Motibo di esaki ta cu riba e cd aki tin e cantica di Padu Lampe “NA MI UN CHENS” cu Edwin Abath a canta den bos duo cu Yumarya Grijt di Corsou na Papiamento y na Ingles. Ademá tin un bonus track di e cantica aki na Papiamento so tambe. E composicion di Rufo Wever cu tin riba e cd ta e wals Anette, piesa cu Rufo a dedica na su mama. Aínda nos ta corda cu Rufo Wever a nace na aña 1917 y a fayece na 1977. Algo cu ta hopi importante pa menciona ta, cu Anette tabata e piesa cu a duna Ola Caribense e empuhe pa graba e cd aki. Danki na Adillée Praag, pianista y lider di Ola Caribense, kende a haci e obsekio aki na e dos personanan aki.

Un sinopsis di Ola Caribense.
Ola Caribense ta un grupa-

cion musical, pero tambe un fundacion, cu tin como meta preservacion y promocion di e musica tradicional di Caribe, specialmente di Aruba, Bonaire y Corsou. E fundacion ta logra y realisa esaki, por ehempel, den duna hobennan e oportunidad pa desaroya nan talento musical den e grupo.

Di e forma aki e fundacion ta sigui desaroya y comparti e amor cu nan tin den nos musica tradicional. E cd di Ola Caribense ta un logro grandi. Grabacion di e cd aki a nifica un crecimiento musicalmente, y exploracion



di e musica aki, mucho mas aína. Pero riba tur cos, Ola Caribense a tuma un paso pa immortalisa e cd, grabando algun obra bieu cu ta masha bunita. A mir'e crece y desaroya: Ola Caribense tabatin algun composicion nobo, specialmente skirbi pa e grupo, uniendo bieu cu nobo y uniendo generacionnan tambe. Y den e proceso aki, Ola Caribense ta extende gratitud na tur hende, na abo tambe, pasobra abo y tur hende ta yuda mantene e ola musical aki na bida. Ola Caribense ta un proyecto unico den e paisahe musical Europeo. E grupo, bou direccion dinámico di pianista Adillée Praag, ta expresa su pasion pa e herencia musical di Aruba, Bonaire y Corsou, cu aínda ta desconoci. Dedicacion di e musiconan no solamente ta pa preserva e generonan tipi-



co di e islanan aki, sino tambe den rebiba nan y presenta nan den siglo 21. Esaki merece un aplauso y un reconocimiento mas amplio. Si bo tin e cd di Ola Caribense den bo man, bo ta respaldando un esfuerzo cultural cu di otro forma lo no tabata posibel. E cd di Ola Caribense ta hiba bo den un biahe musical na tur e islanan.

Integritenan di Ola Caribense ta: Adillée Praag, pia-

nista y lider di grupo; Brian Monsanto, fluit; Dennis Acton, percusion; Elisa Alvarez, cuatro; Jerson Martina, baho; Mee-Ling Wong, cuatro; Mina Honma, violin; Tshepho Pietersz, percusion. Den parti di backup: Clemens Lasten, baho; Jair Konter, piano. Musiconan invita: Edwin Abath, cantante; Ludwig Rondón, guitarra; Mariëtte Landheer, cello; Yumarya Grijt, cantante. □

